



**Peqqissutsimut innullu Innarluutilinnut Naalakkersuisup Anna
Wangenheimip oqaaseqarluni oqalugiaataa**

**Erhvervskandidatuddannelsen i Klinisk Sygepleje og Den Sundhedsfaglige
Erhvervskandidatuddannelse-mik, tassani Syddansk Universitet SDU,
suleqatigalugu Ilisimatusarfimmi ulloq 1. september 2025 atoqqaartinneqarput**

Asasakka ilinniartut, ilinniartitsisut, suleqatigisat qaaqqusallu,

Nuannaarutigilluinnarpara tulluusimaarutigalugulu ullumikkut maaniissinnaagama. Killiffipput Kalaallit inuiaqatigiinnut pingaaruteqarlunnartuuvoq aammalu maani nunami piginnaasavut pitsanngorsarniarlugit ataatsimut suliniutaalluni. Tassa, maani ilisimatusarfimmi sivisuumik utaqqineqarsimasoq erhvervskandidatitut ilinniarneq; Erhvervskandidatitut ilinniartitaanerup iluani peqqissaasutut aamma Peqqinnissamut tunngasumik Erhvervskandidatitut ilinniarneq (Erhvervskandidatuddannelsen i Klinisk Sygepleje og Den Sundhedsfaglige Kandidatuddannelse), aallartisarneqarpoq.

Taakku ilinniartit universitetimi toqqagassaannaanngillat, unammillernarsinnaasunulli akissutaapput, peqqinnissaq pillugu sulissaqarfimmi unammillernartut annertuut maanna nalaappavut tassaasut: sulisussarsiorneq aamma sulisut piukkunnartut pigiinnarnissaat, najukkani piginnaanngorsaqinnissamut pisariaqartitsineq, nunatsinnilu ulluinnarni suleriutsip pitsaassusaa nukittorsarnissaanut kissaateqarnerput.

Naalakkersuisut erhvervskandidatitut ilinniakkamut nutaanut isumalluarput. Tamanna peqqinnissaqarfimmik piujuartitsisumik pilersitsinissaq pillugu tamaviaarluta suliniuteqarsimanitsinni alloriarneq pingaarutilik kiisalu annertoq, tassa nakorsanik ilinniartitaanermullu piginnaasallit aammalu ilisimatusarnermik tunngaveqartumik ilisimasat kingulliit tunngavigalugit iliuuseqarnermik ineriartortitsinnaasut tassaniipput.

Piffissaq manna tikillugu akissarsiuutigalugu peqqissaasutut atorfilittat ilinniaqqikkusuttut Danmarkimut imaluunnit nunanut allanut ilinniaqqikkiartorlutik aallartariaqartarput. Ilaqqutatik, angerlarsimaffitsik, suliffitsik ikinngutitillu ukiut marluk tikillugit qimaqqasariaqartarsimavaat.

Nunatta avataani ilinniaqqissallunga siornatigut qinnuteqarsimasut ilagaannga, ilisimavara periarfissatsialaasoq, kisianni tamanna inuttut aamma aningaasartuutininik pilliuteqarfiusarpoq.

Taamaammat Erhvervskandidatitut ilinnialertussat nutaat, peqqinnissakkut sulisutut ilinnialertussat nunatsinniiginnarnissaannik periarfissiivoq, tassani ullup affaa

sulinissaminnik periarfissaqassapput, ilutigalugulu Syddansk Universitetimiit internetikkut ilinniartinneqarsinnaassallutik. Ilimmarfik, Syddansk Universitet aammalu Kalaallit Nunaanni Peqqinnissaqarfik suleqatigiilluarnersigut tamanna pilerpoq.

Ilinniartuuvusi piumassusillit sapiissuseqartut aqqaneq marluk, ilinniarfimmi nutaamut siulliullusi qinnuteqarnissamut periarfissamik tiguisut. Qulingiluaasusi Erhvervskandidat i Klinisk Sygepleje-tut (APN) ilinnialertussaavusi, pingasullu Den Sundhedsfaglige Erhvervskandidatuddannelse-tut (SFK) ilinnialissallutik. Siornatigut Danmarkimut ukiumut ataaseq imaluunniit marluk ilinniaqqikkiartortillugit aallartinneqartarsimapput, taannalu qaangereerparput, massakkummi ilinnialertussat aqqaneq marluupput.

Massakkut ilinniaatigaluni sulineq ukiunik sisamanik sivilissuseqartoq aallartipparsi, tassanilu sapaatip akunneranut ataasiallusi pingasoriallusiluunniit ilinniartassallusi ilutigalugu sapaatip akunnerani akunnerit 25-t akissarsiaqaatigalugit suliamut attuumassuteqartumik sulisassallusi. Tamanna peqqinnissaqarfiup tungaaniit aningaasaliineq pingaarutilerujussuartut isigaara. Tamanna inunnut, suliatigut peqqinnissaqarfiullu siunissaanut aningaasaliineruvoq.

Taamatuttaaq neriuuteqarnissamut aningaasaliineruvoq. Siunissamilu nunarsuarmi sulisut sullarissut pikkorissut sulisoriinnarnissaanut neriuuteqarnermuttaaq tunngasoq. Innuttaasunullu angerlarsimaffik qanillugu pitsaasumik katsorsarnissaannut periarfissamik neqerooruteqaannarnissamik neriuuteqartitsisoq. Minnerunngitsumillu, kulturikkut nutaanik ilisimasaqalernermik pilersitsisinnaassalluta aamma ilinniagartuutut piginnaasaqartitsilerumaartoq, maanilu nunami peqqinnissakkut sullissinermi tamanna nalinginnaasunngorumaartut neriuutigaarputtaaq.

Ilinniakkanut ukununnga pilersitseqataasunut tamanut qujarusuppunga. Minnerunngitsumillu maani Peqqissaanermik Pinngortitamillu Ilisimatusarfimmi aqutsisut sulisullu, Syddansk Universitetimi suleqatigineqartunut, peqqinnissaqarfimmilu aqutsisorpassuarnut sulisorpassuarnut, ukununnga ilinniakkanut tapersersuisunut aammalu suleqatiminut ilinniaqqikkusuttunut tapersersuimmata.

Naggasiutigalugu ilinniartunut imatut oqarusuppunga:

Eqqaamallugu maligassiuisuugassi. Peqqinnissaqarfiup siunissaanik ilusilersueqataagassi. Akisussaaffimmik tigummiaqarput aammattaaq paasisassanik nutaanik piviusumi atorneqarsinnaasunik pilersitsinissamut periarfisseeqataavusi.

Ilinniarnissinni iluatsitsilluarnissassinik kissaappassi. Tapersersuilluarumaarpugut ilissinnillu atorfissaqartitsisuusugut amerlavugut. Ilissi suliniutissani – napparsimasunut, suleqatigiinnut aammalu inuiaqatigiinnut tunniukkumaakkasi qanoq allanngueqataajumaanersut takunissaanut qilanaarpugut.

Qujanaq.